

24 MAY 2000

MIRZAN-AUSTRALIA/I

MIRZAN JEMPUT PEMIMPIN PERNIAGAAN AUSTRALIA LAWAT MALAYSIA

Oleh: Neville D'Cruz

MELBOURNE, 24 Mei (Bernama) -- Pemimpin korporat Malaysia Mirzan Mahathir hari ini menjemput pelabur dan masyarakat perniagaan Australia melawat Malaysia dan mengkaji peluang perdagangan.

Mirzan, Pengerusi Kesekutif Konsortium Logistik Bhd yang kini berada dalam lawatan ke tiga bandaraya Australia untuk mempromosi Malaysia, berkata dalam satu pertemuan perniagaan di sini bahawa ekonomi terbuka Malaysia mempunyai banyak kelebihan.

"Kami telah berjaya menarik pelaburan dari seluruh dunia, khususnya dari negara-negara maju," katanya.

"Tenaga kerja yang terpelajar dan mudah disesuaikan, suasana perniagaan yang kos efektif, prasarana yang baik, persekitaran sosio-politik yang stabil dan insentif-insentif pelaburan telah menjadikan Malaysia sebagai antara pilihan pelaburan terkemuka."

Mirzan, yang lawatannya dianjurkan oleh Jawatankuasa Bagi Pembangunan Ekonomi Australia, menggesa rakyat Australia supaya mempunyai strategi teguh apabila menerokai rantau ini.

"Seperti banyak negara, masa yang terluang untuk memahami budaya, dasar kerajaan dan persekitaran perniagaan Malaysia adalah masa yang dipenuhi dengan betul," katanya.

"Jika anda mencari rakan daripada rakyat Malaysia, lakukan proses pilihan yang tegas dan cuba fahami apa yang menggerakkan mereka. Kami mempunyai masyarakat perniagaan yang profesional dan kami juga mempunyai epal busuk.

"Saya sendiri meluangkan masa dengan rakan-rakan berpotensi... ia membantu saya tidur lena pada malam hari apabila saya telah membuat pilihan yang betul," katanya.

Mirzan, yang melawat Sydney, Melbourne dan Perth, berkata fokus Malaysia mengenai ekonomi dan teknologi baru dan kenyataan rakyat Malaysia sebagai mewakili Asia harus ditimbang jika pelabur Australia mencari ruang memasuki pasaran Asia.

Beliau turut menghargai sumbangan Australia kepada pendidikan beribu-ribu rakyat Malaysia.

"Kami sendiri menghargai hubungan kami dengan Australia dan berharap hubungan ini akan terus ditingkatkan," katanya. -- BERNAMA

NDC JR